


Prome grupo di hoben a ricibi nan certificado di Formacion Social



Prome Minister Eman, hunto cu e 4 graduadonan.

ORANJESTAD – E hobennan Marlon Peterson, Roger Diaz, Shamir Maduro y Michelangelo Kock, ta cuatro hoben cu a forma parti di e proyecto Formacion Social, kendenan a core stage di cuatro luna na APA, a haya nan certificadonan for di man di Prome Minister Eman, iniciador di e proyecto promotor aki.

Esaki a sosode den Kowloon Restaurant den presencia di sr. Ronny Angela hefe di e departamento di seguridad di APA NV, nan coach y mentor sr. Raymond Kock, sra. Jessey Ras coordinadora di e proyecto aki y un mama feliz cu tambe tabata presente.

E hoben Arion Maduro no por tabata presente pa motibo di a haya un accidente y tabata interna. E lo termina su stage den Kazerne mes. E hobennan a ricibi dos certificado. Un di Security Standard Operations Procedures y di Safety & Security Awareness Program. Awor nan tur ta sigui cu e ultimo trayecto di e proyecto cu ta un curso di Computerkunde na Enseñansa pa Empleo.

Ronny Angela a splica riba e dos cursonan cu e hobennan a pasa cu exito. Nan a traha riba seguridad riba tereno di waf durante dos diferente sorto di war-



Shamir Maduro y Michelangelo Kock, contento cu nan diploma den nan man, hunto cu Prome Minister Mike Eman.



Shamir Maduro ricibiendo su diploma for man di Prome Minister Eman.

da pa e periodo di 4 luna. "Nan mester a custumbra cu e proceduranan hopi estricto cu tin riba tereno di waf. Nan ta aki awe pasobra nan a pasa nan examen cu exito".

Prome Minister Eman ta

masha satisfecho con e Formacion Social ta desaroyando su mes. El a conta con algun siman pasa el a bay Kazerne pa e di dos grupo cu a termina su di prome trayecto. Awor e hobennan aki ta siguiendo



Prome Minister Eman, hunto cu e graduado Marlon Peterson y su mama.



E grupo completo, hunto cu Prome Minister Eman y Sr. Ronny Angela hefe di e departamento di seguridad di APA NV, nan coach y mentor Sr. Raymond Kock, Sra. Jessey Ras coordinadora di e proyecto.



Roger Diaz ricibiendo su diploma for di man di Prome Minister Eman.

nan cursonan na Enseñansa pa Empleo. Eman a bisa cu di parti di Hulanda Aruba ta hayando tur cooperacion cu e proyecto exitoso aki. El a dirigi su mes na e hobennan bisando nan cu nan ta hopi avansaba cu e proyecto. "Boso a logra e di prome y di dos fase caba y bayendo pa di tres. Cu e certificado aki den man boso oportunidadnan den bida

y riba mercado laboral ta bira mas grandi. Hopi pabien na cada un di boso y tambe hopi bendicion y exito cu e siguiente paso". A sigui un brindis chikito organisa pa APA NV pa e hobennan y Prome Minister hunto cu nan coach y hefe di seguridad di APA NV y coordinadora di e proyecto. Un atencion positivo y bon mereci pa e hobennan cu a demostra cu nan por. □